



BAFA 2024 – vogelfrei

(Blaggedde normal)

Mir schtöhn im 'Vierzygschte Joohr ohny Örgeli doo,
will IHR singet dr Refrain und dä gooht esoo:
Fidirallala ...

(leerer Vogelkäfig)

Die Blaggedde das Joohr, die isch dr Wahn!
Und nimmsch dr Vogel druss - sogar vegan.
Fidirallala ...

(Kriegseule)

Ych find künstligy Intellygänz überhaupt nid schlimm
Ych find künstligy Intellygänz glaub nid so schlimm
Ych find künstligy Intellygänz überhaupt nid schlimm
...aber fir e Pointe längt das Programm denn nimm.
Fidirallala ...

(Quietschiäntli)

Ou ... das Gschyss wäg Frauedemo und Gummyschroot
verschand y nid, wills by mir mit Fraue nur mit Gummi
gooht.
Fidirallala ...

(Pingu)

Me kha s Lääbe nimm zaahle – so my Kalküül ...
Wandre mr uss – kemme zugg und fordere denn Asyl ...
Fidirallala ...

(Vogel us Blätter)

E gryeny Schtadt, die blybt e Traum!
Do hogg y lieber unter my Gummybaum.
Fidirallala ...

(Firebird)

Wotsch Äggschen haa – so richtyg schargg,
goosch aifach in Dreiroosepargg.
Fidirallalla ...

(Vogel Strauss)

Ych ha d 'KI gfroggt: Was koschtet d Grangekasse?
.....
Fidirallala ...

(???)

«MY Hamburger» (englisch) heisst «my Bolle Fleisch»,
aber Vorsicht, wenn de «his» «Bolla» saischt!
Fidirallala ...

(BVB-Vogel)

Wotsch vo dr Märthalle ins Gundeli muesch persee
via Brausebad, Allschwilerplatz, Morgartering,
AllschwilDorf, AllschwilLette, Neuwilerplatz, Dorebach...
lueg doch sälber in dr App vo dr BVB.
Fidirallala ...

(Gans)

Die Gans im Keefyg, die duurt my schier...
By öis gits en 1a Daunedüvet vo doote Tier.
Fidirallala ...

(Dagobert Duck)

D Kryptowähryg isch öbbys, wo my Sohn nid schluchcht!
Är het s Sagggäld für Schoggytaler brucht.
Fidirallala ...

(E Flugli)

D Patrouille Suisse im Keefyg macht kai Sinn.
Besser s hoggty dert dr Süssli drin.
Fidirallala ...

(E Nochwärs)

By de Horburg Schlurbby laufft ganz ney
dr Vortraab nur no mit Pfäfferspray
Fidirallala ...

(E Nochwärs)

Super, dass dr neu BVB-Bus elektrisch gooht:
Jetzt kunnsch klyyma-neutral eleggtrysch z schpoot!
Fidirallala ...

www.die-antiquierte.ch





Fasnacht 2024

Letschti uff dr Aalag, bi dr Brugg Dreiroose,
Mit em Velo raase mir, doch das isch in d Hoose.
D Schugger kessle iis denn yy, dien is e Buess uffzwinge,
Mir sin kai Demonstrante, dien au kai Drooge bringe.

Dä Abfallkybel isch so dyyr und wiescht mit sinere Klappe,
Mit Sunnestroom prässt är dr Drägg vo diir und au vom Bappe.
Doch wäägem Stadtbild muess är wägg, Recycling isch doo
wichtig.

In Moskau bi de Wahle wär dä als Urne richtig!

D BVB muess IV-grächt, e ney Drammhyysli baue,
Fyr dr Baarfi gäbts das au, doch d Liiferig duet stau.
Im Momänt ischs nid so schlimm, bressiere duet das nit,
Wills doch uffem Baarfi, kai Maischterfir meh git.

Uff dääre Wält gits vyl Konflikt, doch d Schwyz duet sich enthalte,
Eso ka unsri Wirtschaft, sich ungeniert entfalte
D Wält brennt immer stärgger, mir schliche druus wie Gaischter,
Dr Bundesroot, dä blybbt neutral, denn är isch Ghosting-Maisch-
ter.

Drämmli griege neyi Sitz, uss Holz, die finde mir ganz toll,
Und im Theater gniesse mir, die Plüschsitz, dert schloofs
wundervoll.

Doch z Ziiri am Paradeblatz, do wärde mir fascht grangg,
Mir kenne niene sitze, s het jo nur ai Bangg.

S Hotel Basel isch jetz zue, mir kenne dert nymm singe,
Scho bald kasch au im Kaffi Spitz kaini Väärs meh bringe.
Was bassiert mit de 3 E, däm kulturelle Schatz?
Zer Not geen sii ins Stücki, dert hets immer Platz.

Mir raadle stramm noch Ammel, wo scho s Härzkiirsi blicht,
Und liebe au d Rampasse und iires Baselbiet.
D Spitäler leege mer zämme, e Härzzentrum isch drbyy,
Doch wird dr Yygriff schwierig, muess s Härz doch z Basel syy.

In Erschtfäld gömmr yyne, s wird dunggel ... und denn wiider häll,
Wägem Schwoobewaage ischs Gleis kaputt, dr Zug nymm schnäll.
Am SBB stoht neierdings "fyr d DB isch doo zue".
D Schwoobe kemme nimm zue uns und mir hän unsri Rueh.

Zem gschitzti Dier erhalte, setzt dr Zolli sich sehr yy,
Und dangg de neye Fasnachtspin solls no vyl divärser syy.
Doch duesch d Natur begränze, dryybsch d Vylfalt ins Verdäärbe,
Gnauso losst au s Comité die wildi Fasnacht stäärbe.

Mir faare mit dr SBB, die Pryyse dien is jetz scho weh,
Und stygge die noh wytter aa, isch bald kai Gäld im Portmenee.
Wo wird dä Stutz verboote? Mir wänn dr Batze zugg!
Gfliggt wird mit däm vyyle Gäld die alt Margrethebrugg.

Die Auti uff dr Velostrooss steere unseri Liideschaft
Denn mit de neye Cargobike simmer schnäll und voll im Saft.
Au d Esther Keller macht mobil und schiggt is iiri Waare,
Mir derfe d Stadbegrienig in d Wält spaziere faare.

Wetsch du ebbis express ha, frogsch uns Kurier, mir liifere graad.
An d Regle halte mir is nit, bim Rootlicht kenne mir kai Gnaad.
Ai Velokurier will gwinne und stoot drum unter Stroom,
Dä, wo so duet strample, haisst Thiriet Jérôme.

No dr Faasnacht wirts scho waarm, und dr Frielig isch scho doo,
Bis Oggdoober schwitzt me fescht, in Rhy kasch denn no immer
goo.

Trotz me Solar und Ökostroom, dien d Gletscher witter taue,
Und will dr Meeresspiegel styggt, muesch d Auti heecher baue.

D Landwirtschaft, e glaine Dail, doch s git vyyl Gäld fyr d Buure,
D Gräabe zwische Stadt und Land muess me sehr beduure.
Gäld gits au fyr d Autibahn, kaschs wände oder drylle,
Gwunne het scho wyyder s Team mit Gäld und Gylle.

Dr Trump, wird är denn Breesi, will Zältlaager baue.
De Obdachlose git är Jobs und lost sii dert verstaue.
Dr Arbeititel vo de Laager, dä isch gar nid nei,
An Yygang losst är schrybe, "Arbet, die macht frei".

Wotsch dr Grieg vergässe, bsuechsch im Zolli d Affe,
D Schimpanse dien zwor stritte, doch sii hän kai Waffe.
Spitzi Zeen hän Leye, Geparde und Hyääne,
Es stoot am Gheeg vom LEOPARD: ' bii bi de Schwooben ääne'.

Uff unsere 'bicilette' faare mer zem 'Nonno',
Dä macht us Daig vom 'Vito' e faini 'Pizza Tonno',
Hesch gnueg, so saisch denn 'basta'
und Kinder sinn 'bambini',
Bisch z Basel im siebte Himmel, haisst das Celestini.

E wilde Bangg vu dr IG WuF



www.igwildundfrei.ch





Fasnacht 2024

D Schwyzer Wirtschaftsbosse am Verzaage
Und ibere Biezymangel klaage
Der Fachkräftemangel paggt au mii am Kraage
Glampfedante und Helgebueb leen adie saage
Als Boodesuuri wird ych s ertraage
Und tapfer myni Helge sälber traage

Ych ha em Jans myni Lägerli gschänggt
Vom letschte Johr, s het troztdäm glängt
Der Jositsch het sich dra Zehn usbisse
Au fir der Staibogg lauft besch...aide
Der Thüring muess e ney Thema sueche
Statt iber d Klimaloki z' flueche

Im Jänner wänn e paar Schwoobestiere
Mit Tragtoore Stroosse und Gränze blockiere
wie han ych die Schwoobefreiheit gnosse
und denn sofort, freudig beschlosse
Em Oberbuur e Bittbrief z schryybe
D Blockade soll bis nach der Fasnacht blyybe

My Frind Franziskus, dä vo Rom
Schwätz mit sich sälber im Petersdom:
„Au wenn Bischöf d Gebot mit Fiesse trätte
Wird ych sicher nid abträtte
Ych will mi no vyyl Johr quääle
Sunscht wärde si no dä Jositsch wähle“

Wägg de Keschte vom FraueEMfinal
Hyylt der Dääge medial
D UEFA wurd der Rahme spränge
Und der EFCEBE us em Joggeli dränge
Liebe Dave, hör uff Zwänge
Fyr Eyer Niwo wird au der Landhof länge

Letscht Johr het, ych finds vermässe
Die ryych UBS, d CS gfrässe
Dangg Bundesgälder, waisch wie krangg
Fliesse d Boni ney bin ere „Monschterbangg“
Wenn ych z Basel an Macht und Gäldgiir dängg
Haisst CS, Comité- Schnitzelbängg

D Esther Keller in ere warme Juninacht
Het bletzlig d Verwandlig zer Baumfee macht
Sie pflanzt Bäumlü do und Bäumlü dert
In Kübel, als Zimmer und uff Brugge, wie gsteert
In der Freiestrooss, was für e Draum
Stoht en ainsam stärbende Lindebaum
Am Barfi unterer Eiche vor em Mutz
Gän sich zwei Heissverliebti e kalte Schmutz
Fiehlsch am Märtplatz wien e Pizza im Oofe
Kasch im kiehle Baumzimmer schloofe
Uff em Wettstaiplatz unter me Olivebäumli
Het e Romabättler haissi Dräumli
Ab der Dreyroosebrugg bi der Wasserschlacht
e Lorbeer-Bäumli en Arschbombe macht
Wenns so wyter goht schlussement
Wird us em Baudep, s Baumdepartement

Letscht Novämber entdeggt e helle Studänt
Zvyyl Händystrahlig macht impotänt
Hesch du der Drang am Smartphone z klääbe
Dyni Spermie nid lang lääbe
Au d Bischofkonferänz, tscheggt wie`s lauft
Sie het jedem Prieschter e Handy kauft



BOODESUURI



Pierrette

Fasnacht 2024

Bim Schport weisch mänggmol nit so rächt,
ob Ma,ob Frau-de gsesch es schlächt.
Däät me bim FCB jetz mische,
denn gäbts kei Zwyfel draa
wenn öbber dört ka shutte,
isch es sicher nit e Maa!

E Bolizischt schnappt in dr Rhygass
E Velofahrer,wo nit drypass,
är faar viil z schnäll dur all die Lüüt
do seit dr ander drääg:
Das isch doch gar nit mööglig
S shtoot jo schtändig ein im Wääg!

Jetz sinn bald alli Dramgleis duss,
au d Archäologe hänn dr Gnuss.
Me isch uf Altertümer gschoosse
Und grabt jetz ganz dief unde
Dört het me vo dr BVB
dr gültig Faarblaan gfunde!

D Dreirosebrugg,um Gotteswille,
dasch nit dr Ort ,wo d wöttsch go chille!
D Frau Käller findets schattig dört
so hört me ämmel munggle-
Im Baudep wärs doch besser:
Dört liggt alles eh im Dungle!

Schnäll Lehrer wärde,das git z rede
me dänggt, das könn schlussändlig jede.
S bruuch fascht kei Praxis, nur Visione-
do kunnt mer e-n-Idee:
me könnt jo au dr Kramer no
als Queriischtiger nee!

Dr Kevin seit entnärvt zum Aendy
Jetz nimmt dä Lehrer mir no s Handy
und macht bi jedere glainschte
Schleegerei e Megapflänz!
Däm fäält doch eifach numme
Die soziali Kompetänz!

Dr Glarner zeigt in rächter Hand
Wie d uusemische sotts im Land..
Dä Misch, wo uf die Gable ghörti,
das het är übersee -
dasch ganz e bsundri Margge
mit em Name SVP!

Dr Putin sitzt am Riisedisch
Und zeigt ,dass är dr Grööschi isch.
Wenn dää no lang regiere will-,
das wett jo keine gsee --
Denn sott me däms doch höggschtens no
E Cämping-Dischli gee!

Jetzt het me grad no d Kurve gnoo
Und d Bänggler nomol iinegloo
Doch wird verkauft, und s wird saniert -
Für d Fasnacht isch das schlimm,
Wenn d Baize immer meh mien saage:
Gäll, du kennsch mi nimm!

Dr Trump pflägt d Wälle mit em Föön
Und findet sich charmant und schön.
Nur öbbis het er gar nit nöötig ,
das duet mi nit erschtuune:
aer muess in kei Solarium
aer, isch jo scho e Bruune!

BANGG- NOOCHBERE



2024



In dr Stadt, doo herrscht jetzt bald im Baizelääbe Rue
S Hotel Basel git's jetzt nümm, au s Koolmanns macht glii zue
No Wyteri wird's dräffe, aaber s Schlimmschte isch per see:
Soo wird's fir dr Kaarli bald mol nyt mee z Suffe gee

Kasch mache, was de willsch, me könnt maine, s will nyt nütze
Drotzdäm dien mir wyter uns're Club doo unterstütze
Hesch wider Luscht uff Gool und willsch Basel gwinne gsee?
Denn styggsch ins Drämmli 14 yy und gohsh zum EHC

Syt iiber eme Joor gniesse mir scho Baseljetzt
In dr Meediellandschaft het das Meedium neu Maassstäab gsetzt
Sie setze gäärn uff Jungi, zum am Zytgaischt könne blyybe
Die sin dailwyys soo jung, die könne nit mool richtig schryybe

Bi dr Sitzig sait dr Laiter vo dr Redagzioon
Du machsch e Horoskoop und du e Quiz zu dr Region
Dy Bricht zu alte Film isch guet und dy Määrli gfallt mer au
Iir kennet schryybe, was iir wänd, well uns liist jo ee kai Sau

Dr Leerer sait, im nyynte Schueljaar zieht äär richtig aa
Me sait den mool e Väärsli uff und moolt e Mandalaa
Als Hööhepunggt wird byybrocht, wie me Stroosse yyberqueert
Mee hän unsri Leerer an dr PH halt nid gleert

D Sarah Regez vo dr Baselbieter SVP
Wurd s Gendere an de Basler Schuele gäärn verbotte gsee
S sig sproochlig nit korräggt, kumm Sarah, halt dr Rand
Was korräggti Sprooch? Du kunnsch doch usem Basel-Land

Dr Bligg uff die Tabälle isch im Häärze wiene Stich
Unt'rem Strich, doo stoot dr FC Basel unt'rem Strich
Doch wenn me gnau luegt, denn schyynt die Zaal gliich wiene Sääge
Das sin kaini Pünggt, dasch dr IQ vom David Dääge

Dr Aint fliegt usem Fänschter und dr Ander findsch im Bach
Dr Nöggscht liggt in dr Gass und es isch e riise Grach
Plötzlich stüürt ain ab und me het e riise Schogg kaa
Das sin kaini Oligarche, das sin mir noch 7 Vodka

In Dütsch hän mir däa Schingge gläase und mir sin verschtöört
Mir finde, dass das Buech vom Fritzl doo nid aaneghöört
Soo Kinderschänder-Gschichtli, jo, die sin doch zletscht am Änd
Fir d Kirche, die kathoolisch, quaasi s neue Teschtamänt

D Generation Z, die isch fir d Aarbedswält vyyl z fuul
Die wott gar nümm schaffe und mee Freizyt fänd sie cool
Pflichte sin egaal, doch die wisse: In dr Noot
Längts mit soonre Arbedshaltig in Regierigsroot

Scho lang isch's so und immer no isch dr Uffschrei grooss
Dr Aint gläabt am'ne Kunschtwäärgg und die Ander uff dr Schtrooss
Au mir dien jetzt e Zaiche setze und das isch kai Spass
Und gläabe uns bis noch dr Faasnacht fescht an eme Glas



Uns Banggnoochbere
findsch au uff Instagram.
Lueg doch verbyy.

dr laibasler

vegan und ohni Fett muess syy
joo kai Zugger, und Salz derbyy
so Ässe das isch wiirgglig gsund
drumm griegt das jede Daag my Hund

y ch gib jo zue bi nit so gscheit
und e weeneli abverheit
so wird ych sicher wärdet's gseh
no Bresidänt vom FCB

es haisst nit Umzug das isch wichtig
es haisst Cortège so isch richtig
e Umzug das sin so Daage
wo duesch Möbel ummedraage

bim Tele Basel sone Witz
wird d Schwiigermamme immer spitz
sy luegt dä Sänder schambaar vyyl
wägem sexi vo Wattewyyl

dr scheenschi Promi in dr Stadt
isch nümme dr Minu das isch glatt
dä Titel das isch neu dä goot
an unsre Basler Bundesroot

d Schieler hänn mit rächne mie
e Job bekömme die so nie
bruche kasch si jä das isch chic
nur z Basel in dr Bolidigg

hösch im Eglisee gits Klaage
Fraueli darfsch nümme saage
jetz haisst`s neu für alli Bebbi
multi kulti Harem Beggi

är isch my aller liebschte Schatz
mir jage zämme jedi Katz
bi uns zwai lauft halt aifach rund
ych gäbt en nümme my tolle Hund

dr Rex my Hund jä hösch ojee
zahlt kaini Hundestüüre mee
är fyyly sich das syg dr Grund
als Katz im Kerper vomme Hund

hösch my Schwiigermamme hejo
will au mol uswärts ässe go
ych laad sy yy jä d Freud isch grooss
und stell dr Ässdisch zmitts uf d Strooss

d Schwiigermamme das isch esoo
het ändlig ziiglet ych bi froh
die neu Adrässe vo dehai
haisst uf em Hörnli Grabfäld zwai

us em Grab duet sy verzelle
my Frau hät e Pony welle
doch laider het sy nie ains gha
derfür en Esel jetz als Maa



Drummelhund 2024 – Pfyffer hinter Gitter

d Schnitzelbangggsellschafte reege sich ab uns Wilde uff
mir singe vyyl z lang, und das macht sy muff
Die Ussaag goot nit, die ifind ych drnääbe
drum due ych mi uss Trotz do aane klääbe

Uff dääre Blaggedde fäält doch ganz ohni z schummle
e siese Hund wo guet duet drummle
vogelfrei, das isch doch bitter
stegge mir Pfyffer hinter Gitter

Wo ych letschti hät miesste uffs Drämmli go
isch und isch und isch, kains ko
Wo ych d Durchsaag hör, ha mer d Auge griibe
Es sy zwische Demo und Baustell hängge bliibe

Hesch e drogge Muul, so hätts doch sy Reiz
Gohsch uff e kiehl Bier, ab in die näggschti Beiz
Und bis Du ändlig hesch Di Bierli gsoffe
isch au die Beiz nimme offe

Als Santiglaus, s isch nümm ganz bache
Heersch langsam nur no komischi Sache
Nikolaus, Santa Claus und kai Vårs meh wo de kennsch
Aber s schlimmschte isch, sy wänn e Grättimensch

Zur Zeit findet in Basel der Hefelimert statt
laufft über Luutsprächer im Tram in unsrer Stadt
S isch mir doch glych, wär me zum Schwätze verknurrt
Solang ych nit hör, dass e Zircher schnurrt

Durch dr Fachkräftemangel ischs leider esoo
hän au mir Bänggler z Basel e Problem bikoo
es dien scho Rambasse ihri Vårs do bringe
jetzt stell Dir no vor, s wurd no e Schwoob ko singe

E Helm mit kuugelsichere Weschte
Drzue Gasmasgge, glaub e Panzer wårs s Beschte
Schwerschtbewaffnet, so dass e jeede killsch
Das bruuchsch, wenn in d Lange Erle an d Marschproob willsch

Isch doch schlimm, über was die alles in de Meedie brichte
Krieg, Eeländ, numme schlächti Gschichte
liber Kataschtoofe wirsch bi mir nie e Vårsli seh
Drum bring ych au keins iber e FCB

Wo d Gigi Oeri in Pool springt, ych weiss es no ganz genau
Isch sy in dä Aazug ghüllt, huttäng, sexy, in rot und blau
Jetzt lueggsch mol zum Dääge, däm lauchig Stumpe
Do miesst jo ych, und zwar blutt, ins Bassin gumpe

Denn bi mir schreye und kreische, all die Gritte
wie zue de Beatles iihre beschte Zyte
Das ka doch passiere, jä hösch was gisch,
wenn de halt wie ych, dr Tschortsch Gluuni vo Basel bisch



Ych, alti Dante, bi ganz inn.
Wyyder verwärte, das macht Sinn!

Statt alti Helge go vernichte,
bruch ych sii wyyder und due ney dichte.
Au s Goschdym isch vom letschte Joor,
sogar my Fett vom Joor drvor!

**Und dr Helgeträger, dä alti Maa,
wänn si im Recyclingcenter au nit ha!**

Ych, alti Dante, ha das Joor Mie,
e Värslu uss em Ärmel z zie.

My Doggter sait, er haig e Spritzi,
wo geege Hirnblockade nitzi.
Aimool täglich vor em Zmorge
ins Fuudi gspritzt, vergissisch d Sorge.

**Ych frog dr Doggter zyymlich harsch:
Isch mi Hirni jetz am Arsch?**

Ych, alti Dante, finds nym glatt
go lädälä in dere Stadt.

Si boore und boore und boore um d Wett.
D Innerstadt zaigt yyr Skelett.
Ai Vorteil hän die Löcher scho:
D Demonstrante hän Mie zum duure koo!

**Drumm mi Vorschlag: bauet wilder!
Bruuchet mee Umlaitigsschilder!**

Ych, alti Dante, bi mym Maa kai Rose wärt,
drby standi stundelang Amhärd!

E Rööschi will er uff em Täller.
Drumm gang ych mit yym schnäll in Käller.
Hand in Hand und Schritt fyr Schritt
und nimm no e Fläsche Cassis mit.

**Nonem Ässe muessi grad in Garte
und uff Jans und d Baum-Schnyyder wartel!
Anstell vo yyne, ha s grad vernoo,
het dr Parmelin dä Job ybernoo!**


Ych, alti Dante, gsee dunkelgrau
wäg dere US Rampesau!

Dr Mister Trump kämpft ganz verbisse,
wills um s Verregge nomol wisse.
Wenn die dä wääle, kunnt mir in Sinn,
dass d Amis blööder als d Zürcher sin!

**Dr Trump im Weschte, dr Russ im Oschte
und z Basel hän mir dr Wäber-Pfoschte!**

QUERYSTYYGER

FASNACHT 2024



Ych, alti Dante, woon in Rieche
gheer aber nit zu de rryche Siächä.

E Värns vo do do inne bringe,
doch yber was soll ych nur singe?
Mir hän weder Demos no Klimaklääber,
wenig Bättler und Stroossegrääber.

**Ych weiss nit, was ych soll verzelle,
doch d Zyttig het e Värns vo Rieche welle!**

Ych, alti Dante, hätt do no soone Fall:
Dä handlet zwar nit vo däm Ball.

FCB, ach FCB
du duesch mir in der Seel so wee!
Do cha sogar ych, alti Pflute,
in mym Rock no besser schutte!

**Das isch en gsy, dr letschti Bangg.
Mir saage tschüss und vyyle Dangg!**



Mir sy d'Schnäggebigger watschle s'erscht Moll dur die Stadt
Für euis syy d'Trämmleschiene vo Natur us zimmi glatt
Am Märtpatz gseht me euis nid gärn, dir kennet do dr Grund
Zem Schnädere, uns dr Barfy meh entgeege chunnt

Sy Flüchtling usem Baselland, me gsehts euis zwar nid a
O über d'Änte wei die z'Lieschtel jetz d Kontrolle ha
Die hei mi Frau do gfroggt, jä wie vill Eier si denn leggt
Das hei mir uf dr letschte Stüüreklärig früsch entdeggt

Bim Sächsilüte d Züri het dä Böög nid welle brenne
Nur Gschrei und Rauch so wie mir d'Zürcher halt scho ewig's kenne
E Tip vo euis fürs neechschte Moll, dir miesst zerscht überlegge
Für das Johr nümme fuuli CS Aggtie drunger legge

Do z Basel hei mir Brugge die vertraage gar kei Drugg
I mym Schnaabel obe rächts mi Brugg o zimmi lugg
Gohts um Vrchehr do het me Stütz, das goht mi öppis a
Will i mir d Chranggekasse gar nümme leischte cha

Mi Änte do die schtotteret und lauft o nümme rund
Fingt dr passend Gang nümme, will sy halt is Alter chunnt
I mach mir Sorge, lüt denn grad bi euisem Doggter a
Dä seit a jä Deuxchevaux, lütte si dr Garage a

Me regt sich uf, wenn uf dr Strooss e so ne Griene chläbt
O grien vrschmirti Huusfassade het me scho erläbt
Dir dörfets do nid läts vrstoh, es isch halt wirgglich so
O mir Änte miesse ab und zue ein useloh

S Wallis het nüt zfiire und dr Constatin muess liide
Am Matterhorn kei Renne jo dä Wing isch nid z'vrmiide
Es Usnahm isch die Fliegeschlyffi, Infantino do
Als Vorschuss für d Viola Amherd, zäh Kamel bechoh

Für die Pointe vo däm Helge nächtelang nid gschloofe
Was dir gseht nid wirgglich, s wer e glatti Katastrophe
D Frau die chunnt a s Rueder, duet die beschte Pöschte bsetze
Für euis Manne het die KI Mieh bim übersetze

Es bruuche gwüssi Schütteler im Winter e chli Hilf
Die Zwee und no Eine, schtöh jo psychisch tief im Schilf
Dr Murat und dr Granit wärde z Basel therapiert
Dr Tauli Xhaka wird i d PUK nach Züri überfiehrt

Dr FCB es macht dr Schiin, chunnt langsam hinge use
Bim Beat Jans ischs offesichtlich, s lingge Ohr stoht use
Im Dääge synni Wächselstube, villes schuldig blibe
Guet gits no dr Beat...dä ghöört zu de erschte Sibe

Im Elsass äne chlöpfes und tätschts si schiesse mit de Gwehr
Bis is Laufetal herrscht Panik wägem Flugvrchehr
Jetz si mir do im Vogelschutzgebiet das freuit euis sehr
Do z Basel o no s Sujet, dasch für euis die gröschte Ehr



PIRATE

Fasnacht 2024

My Maad, dä het ins Gundeli welle
No muess är yyber, d'Bassarelle
Deert duure muess är, wyder zrugg
Dä Kaib isch z'schwäär, für d'Margrethe - Brugg

Drülla het nit, an d'Fasnacht welle
Sii haigi Angscht, duet sii verzelle
Wäg dr Bolizei, sait sii am Änd
Sii sig vermummt und het, e Dransparänt

E jede wott, e E-Drottinet
Am beschte vo dr Stuube, bis in's Bett
Wääge de Trottnet, ich miecht e Wett
Das es glyy Laadestatione, uff de WC het

Um das Sujet, "Vogelfrei"
Gits by uns, e ryyse Gschrei
My Maad dä isch, e Jäegersmaa
Und d'Drülla wirft, dr Grill scho a

s'letscht Fuudi-Kino, s'Mascotte schliesst
Well das deerte, kain me gniesst
Derbyy wurd's laufe, s'wär richtig glatt
Gänd aifach, jedem Pfarrer Rabatt

dr Käpt'n isch jetz au, bi Tinder
Das isch do so e, iu-iu-finder
Mit "rächts" und "linggs", ha ich kai Glügg
Jetzt ha ich e "Mätsch", mit dr Heidi Mück

Ich mach uff em Schiff, my normale Tschegg
Do rennt mi Maad, fiidleblutt über's Deck
Är danzt und singt, und findet's top
Käpt'n Käpt'n isch dä geil, dä Allschwiler Coffeeshop

Au miir hän e moll welle, brobiere
Geege irgend ebbis, z'demonschdriere
Miir bekomme e nai, vo dr Bolizei
'Leider isch, kai Samschtig me frei"

Hyt het e jeede, e Allergy
Milbe, Polle, bisch au derbyy
Dr Maad isch indolerant, geege Laktose
No donnertets halt, in syne Hoose

s'Eva Scheff vom Ständeroot
dr Nussbi Scheff, im nationale Root
Und dr Jans isch Bundesroot
Jetz frooget e moll, wie´s de Ziircher goot

Mir sin e weeneli, versteert
Will GC jetzt, de Amis gheert
Mir findes guet, was ich bedoon
worum kaufe die nid ,dr ganz Kandon

Sii, mir Pirate, s'isch nid glooge
Sind au emol, in d'Ferie gflooge
No gseen mir e paar, im Fluugi sitze
d'Händ zem Gebätt, und schuurig schwitze
dr Gurt leen si sich, vo dr Stewardess schliesse
Si hätte dä, nur heebe miesse
Bim staarde wärde si, bleich und bleicher
Was sind denn das, für Hoosesaicher
Si jommere, dr ganzi Fluug entlang
Und sueche panisch, dr Notusgang
Die sitze do, so ganz verloore
Dien mit zwai Finger, in dr Naase bohre
Au bim Ässe duet's ne, schuurig stingge
Will Si d'Suppe mien, mit em Röhrlü dringge
Vom ainte, hän mir denn vernoo
Är sott e moll, uff´s WC goo
Das fallt ihm schwäär, du muesch begriffe
S'isch pyynlig wenn de s'zweite, muesch go schiffe
S'wird äng, wenn´s Fuudi so butze muesch
Dass nid alles, an's Hemmli stryche duesch
Mir grümme uns, vor luter lache
Ab all dääne wirglic, komische Sache
No meerge mir, mit viel Verstand
Es sind Klimaglääber, und kriege d'Händ nimm ussenand